



東岳集 八

江都後錄

東岳集

~16
2432
8



和
2432
2-8



東岳先生集卷之十八

江都後錄



崇禎元年戊辰夏六月江華留守闕吏

曹入 啓令備局議薦初五日甲午備

邊司 啓曰江華留守擬望別單書

啓矣群議以為李某曾為本府府尹有

能聲吏民至今思之可合擬望云而方

主罪廢之中自下不敢並擬而群議所

係亦不得不稟 傳曰李某叙用除授

初七日丙申家奴石宗自京城捧除目

而來竊念微臣得罪清時奄及五年一
志增惕屏伏田里自分歿身特蒙 殊
恩遽加 明命驚惶震越罔知所裁謹
拜手稽首書以自志

一出脩門火五昏玉墀新命下丘園愚臣正抱
非常罪盛代偏霑莫大恩紫綬仍無紆重寄丹
書不獨滌幽寃名同借寇還堪愧邑子曾聞謾
叫閤丁卯春獲賊之亂邑人曾為我陳疏雪寃故未勻云大都

發沔鄉作

萬死還鄉守一庄分甘微命老耕桑初聞邸牒

疑如夢重見官奚喜欲狂清世敢期湔罪狀非
才誰道被恩光隣人不識纍臣事却哂趨朝趣
曉裝

題法林上人詩卷

師袖余萬曆戊午春到厚陵興教寺追
步亾友權石洲韻留贈詩自聖居山開
聖庵來亦撫事感時相視慨然輒用其
韻又成一篇時崇禎戊辰秋七月初吉
也

老翁顏狀象皆疑此地重逢不自知興教寺花

寒食日鎮江山月早秋時招呼本擬偕栖遁放
逐那堪又亂離十載世途經百變短牋無恙故
人詩

奉簡南陽府使李天章

爲問南陽伯能思東岳翁湖庄隔春水江郭起
秋風世事艱危際君恩曠蕩中十年身再到
無與一樽同

義賢真一希安三上人自南漢山來訪

共乘炎熱到京華江島相尋路更賒連浦瘴雲
生睥睨隔峯秋雨濕袈裟百年有約三盃飯千

事無心一椀茶却被小胥齊目笑使君居作梵
王家

送義賢真一希安三師遊白蓮積石傳燈

淨水四寺

坐送三關士行尋四給園青山多古蹟白日絕
塵喧世亂縻公務才微荷國恩沉吟思桂樹不
得共攀援

贈義賢真一兩人

三角山前始賞音一間亭上幾開襟白衣朱紱
知吾命赤日青泥見爾心獨鶴自緣何事舞寒

蛩又作去年吟宦情本淺身多病徑欲投簪寄
少林

積石寺妙正上人傳燈寺志敬上人淨水
寺裕巖上人文殊寺天悟上人一時見訪
喜甚有賦時南漢山義賢真一希安三禪
師並來見余而去纔兩日矣

平生性癖愛雲林到處沙門託契深昨日三師
纔見過今晨四釋又招尋年荒吏哂頻留饋夜
短僮嗔久對吟直欲身隨飛錫去秋霜滿鬢愧
朝簪

奉簡李僉知子陵

君以奉使關西時經驛不替人馬謫配
揚州平丘驛

我遷洪日君臨利君謫揚時我守江一水東西
自鴻燕兩家榮辱互珉瓦夏厨五粒調盈斛冬
榻金漿餽凸缸重惠平生不可揭三旬空愧寄
魚雙

奉答青雲君沈德用書問兼示具白川
伯鞏

孤臣天末音離群日下音書詎可聞四海通家

白川守百年知己青雲君公需紫蟹多蒙寄
御賜玄珪遠見分今到黃堂逢赤立辱函臨報
愧空文

鄭監役希毋坡平尹氏挽詞

曾作江都尹偏知孟母賢黃堂重莅日素幕永
遷年一壻玉相映六男珠共聯諸孫二十八百
世慰三泉

趙知事性挽詞

吉德周行倚老成早推公器作邦楨七旬齒遽
虧中壽八座班仍阻上卿每憶北扉矜鍛鍊敢

忘東峽累澄清江城况躡懷仁地坐檢遺牋淚
滿纓

申領相欽挽詞

屈指壬申迄戊辰大東黃閣幾名臣方知自昔
蘇張手不見如公稷契身早遇先朝資黼黻終
歸 聖主贊經綸巨川不濟高梳折罷市都人
哭徹旻

磅礴乾坤秀氣鍾中興經緯倚儒宗漢朝共喜
晨開閣秦國誰言暮輟春常憶范睢償一飯况
蒙雷煥掘雙龍城南投謁旬纔浹拭淚空瞻太

白峯

題志敬上人詩卷

師以余爲府尹時所贈詩來示乃萬曆
己未夏作也師住傳燈古寺曾不出山
余於其歲臘月秩滿而去及至天啓甲
子春被不測之罪竄逐北塞今者蒙
恩再莅于茲奄忽俛仰之間已十歲矣
人事百變無一可悅手披塵牋恍若夢
寐撫已興感有不忍言者輒復用其韻
以自志云時崇禎戊辰仲秋上澣

迷途十載我何堪
羨汝空林守一庵
桎梏解時投磧雪
袈裟披處對峯嵐
重逢古府真如夢
獨展殘章未忍談
謝病直思依佛日
西風吹鴈又賓南

崇禎元年九月初六日左承旨姜頊期成
貼民惟邦本食爲民天天降酷灾百穀大
無哀我無恒產之民未免盡填溝壑予極
憂悶罔知攸濟卿其嚴飭府官使之體予
至懷夙夜匪懈賑窮調乏俾不至餓死予
當遣官廉察如有餓孍則當抵罪不宥事

有 旨臣於本月初八日謹伏祗受仍接
是月初六日邸報自
上傳曰舉義以後凡干御供之物或因下教
或因䟽劄幾盡減損而其中時未請減者
貂裘也該曹必以禦寒爲重不敢請罷西
民凍死之時身着輕裘心甚不安今年勿
爲進排以其價布下送兩西使之分給赤
脫之民且內酒房香醞仍存於凶年亦甚
不可 大妃殿供上外其餘各殿限明年
秋成間並爲停罷以其酒米補用於京中

賑救臣竊觀

聖上遇此大侵之歲軫恤飢民特下惻隱之
教申飭中外另加賑濟至於減貂裘罷香醞
賤約節損之道靡所不用其極凡在瞻聆
畢同竦躍孰不感悅繼以涕泣况諸守土
之官尤當兢惕罔或怠遑第惟本府今爲
保障之地自經去年駐 蹕以後民生已
困廩粟方匱其何以下賑饑乏上副 憂
勤臣誠惶誠恐不知所圖謹綴七言近體
詩一首庸抒微志

八路凶荒達 聖聽絲綸一札諭丁寧初憐凍
卒冬裘減却慙飢眠內醞停保障况煩趨號令
困倉曾耗捧朝廷窮閭賑貸終無術感戴宸
慈涕自零

九月九日

常愛重陽節最佳海城今日只傷懷行宮寓直
非公解戍壘后巡有御街歲旱更堪臨野隴
時危不敢上山崖茱萸插鬢空如夢卧聽梧桐
墜石階

寄別龍溪金叅議別之任清風郡

湖西四名郡第一說清風境是神仙窟官無簿
牒叢真宜養病地還着好詩翁遙見江樓上入
間萬慮空

寒碧樓四絕句重寄清風金使君

寒碧樓前水急流西來直過甲津頭新詩定得
江山助倘寄漁商下峽舟

水部留詩寒碧樓今經二十七中秋遙知好事

新明府塵壁時時拂上頭

考院曾賦詩板諸壁
上時為工曹正郎

百年人事捲雲浮身老從知萬念休寒碧樓中

高枕卧不須騎鶴上揚州

沙熱故州山水幽朱轡東去趁清秋十年江島
重分竹曉夢空尋寒碧樓

贈別朴秀才

瑣舊名聚汝潤還鏡城

乙丑分携到戊辰何言北羽會南鱗金章紫綬
新留守玉塞黃沙老逐臣當日若非仁里宅異
方能有病夫身却將別恨詩為記江樹秋風鏡
草春

楚臣曾放逐胡地獨淹留一飯當時惠千金不
可酬春雲磨谷曉夜雨沁城秋聚散殘生事無

言淚自流

寄賀鄭先達

致擢第乙科君時年二十歲

鷓鴣才格出時賢毓秀蓬萊器業全蘇監乙科
新擢日陸郎文賦盛傳年桂林玉樹聯三葉壽
宿台階聚一躔老眼識人翻自許公卿詩句記

洪川

余在洪川時曾貽君詩有兩家子弟吾偏忝三代公卿汝又賢之句

姜正字

君白宅作

憶昨鸞輿避虜塵孤臣徒步此江濱青莧白飯
相尋地紫馬朱衣再起身鄉叟共生今日敬旅
程曾被幾家嗔對君前後真顏色一夢人間萬

事新

晉陽才子住江城問字曾勞載酒行本向庭闈
叨地主敢憑詞賦號門生乙科第一傳衣鉢庚
契從初結弟兄寄食忽思遭亂日兩家終始百
年情

次從姪汝固見寄韻

私門竊喜返初衣尚怕南冠繫北扉鎖鑰孰言
紆 寵命絲綸今覩弛嚴威三朝一斥投關塞
十載重臨鎮國畿直欲斬鯨遼海上鯁岑無復
羽書飛

稷契平生共許身文章不數漢庭臣東萊清節
熾揚震西域殊功笑郭恂三月却驚才未展五
年何恠道偏迤江湖再起休相慶隻手難教宇

宙新

紫煥曾頒 御墨濃却磨瑕垢賴陶鎔股肱畿
輔驚分虎雷雨江潭喜起龍戰陣方思輸瓊力
盟壇詐忍驗遺蹤顧慙坐嘯縻官廩驥足終難
展蟻封

聞從姪汝固以九月二十六日除授兵曹
叅議自砥平山居還京城詩以代書用前

日見寄首篇韻

聞君還脫舊山衣，劍佩趨朝出石扉。只以是非生好惡，未應榮辱係恩威。老身自斷填溝壑，昭代何期守甸畿。堆案簿書妨命駕，別魂空復渡江飛。

附次韻

岳老今年解赭衣，澤泯重入識彤扉。空名仁使俗輕重，微命慈關天德威。近侍舊班仍宿衛，留都新命亦邦畿。夔臯勲業付少壯，回首白鷗江上飛。

南陌緇塵復染衣，一冬羈宦夢山扉。親年向老，貧妨養國步，阽危武失威。起廢公難辭管鑰，銜恩我亦戀坳圻。相思只隔重江水，坐閱空廊落葉飛。

寄賀南陽李天章使君時聞其子一相乃於九月二十五日謁聖別試擢丙科及第年纔十七云

自吾容祖到湖陰，十八登科聳士林。况又郎君纔十七，妙才方始見於今。

十八生男世固稀，登科十七益堪奇。相公門戶

今誰敵三葉同朝四桂枝

天章十八歲生一相右議政月沙相國與

天章道章兩學士及一相父子孫三世四人並以文科一時登朝

敬次月沙相國謝解戲寄之韻

熒熒二十八珠璣江海秋風豁所思僕本無腸似公子相門還共賴芻持

具司議茶士慎寓居府南大津里中營小

堂始成奉教君瑞鳳適銜使來觀其日乃司

議初度因設壽酒徵一語以志遂用從姪

參議汝固贈別奉教韻聊博粲云司議生

於隆慶戊辰十月十八日今年乃換甲也

一區能占四難并莫把江都比錦城高棟共稱

司議宅彩衣還覩翰林行歲周予子仍逢誕歌

徹兒郎且落成剩欲題詩挹盛事文章終愧學

西京汝固詩頌開錦里草堂成故第一句云

李侍直尚書鄭氏挽詞

兩家相吊一般悲塵世光陰僅涉暮春兩月溪

浮旅櫬朔風沙峴度靈輶休論五十逾三十忍

把無兒比有兒侍直君今收涕淚試看東岳老

鰥詩

義賢上人住廣州南漢山城天柱寺門徒

頗衆曾糶官穀遣敬浩沙彌來遺白紙二十束請易米一斛以爲納倉之資戲書以答之

堪笑浮屠六不羈廣陵留滯遣沙彌餐霞久負
休糧計鬻紙翻營糶穀資炎雨夜廬相訪日暝
烟官渡獨歸時傾困直欲酬深眷赤地蒼生正
訴飢

真一上人在南漢山城開元寺進步余華
字韻見寄復用其韻而謝之

忽驚燕石博瓊華南漢青山入夢賒雪院掩扉

燒楮松雲房憑几掛袈裟何由更事西窓燭每
憶同煎北苑茶別後官居君莫問荒年不及卧
田家

重寄真一師

向老身難健經秋意易悲何言江雪夜得見岳
僧詩五載孤臣夢三冬倦客姿黃堂空坐嘯未
赴白雲期

奉贈族兄明甫
名景升生於嘉靖丙寅年
今六十三乃粟谷先生之
姪也與我同五世祖少力學頗
能文屢舉不中特居開城府內

見君寒餓衆皆驚况又同宗骨肉情黃卷早能

傳世業白衣終不占科名誰云粟谷先賢姪尚
作松都老學生江甸歲饑官俸薄愧無益米助
藜羹

白髮蒼顏六十春平生樂道任家貧三間杜子
羨茅屋一幅陶元亮葛巾身世相忘夢蝴蝶功
名不羨盡麒麟時沽濁酒鳴琴坐盛代方知是
逸民

申領相夫人全義李氏遷葬挽詞夫人與

生丙寅歲先領相即世初定通
津卒後廣州與領相同室異兆

黃閣梁摧日玄堂劍合年生曾同甲子歿豈間

山川奕世貂蟬貴承家駙馬賢哀榮終始事樂
石有新鐫

天祐吾東岳降神甲門良匹並生寅二男五女
膺家慶八座三階翼世屯鶴去忽驚琴閉匣龍
蟠方見劍騰津纍然都尉當朝貴行路咸嗟孝
誼純

重贈明甫兄

人笑公迂我愛真怡然不見有時嗔市中蝸室
纔容膝雪後鷄衣却露身萬事拚拚琴一曲百
年惟待酒三巡試看肥馬輕裘者幾作奴顏向

要津

注林上人自聖居山至戲書以示

自佩江城印年荒困簿書困倉積逋稅閭巷急
追胥不但林泉間仍兼翰墨踈空門舊友在
見一愁余

已巳元日

王衡中夜又回寅六十如今少一春海近戕風
喧島嶼天寒虐雪積城闌大青浦上三臨地長
白山前萬死身坐筭此生都似夢腰金無賴鬢
成銀大青浦在府南十五里余於萬曆癸巳冬
避海賊之亂來寓此地丁巳夏以府位而

來今又為留守故云三
臨長白山在鏡城府北

玄悟上人以五峯相國詩來示索和謹步
其韻而贈之

莫問名儒釋須觀行是非江心孤島雪卷首老
峯詩遁世真無累談天了不違窮通吾已斷只
自皴吟眉師頗通命
書故云

五十今加九方知伯玉非平生空使酒晚歲尚
治詩雪月元宵逼雲山故業違官齋成獨坐見
爾一伸眉

伏帝乾坤在周公禮樂非凌雲司馬賦泣鬼翰

林詩荏苒三朝過嶠嶇萬事違白頭梳已短無
術學黃眉

寄贈學慧上人遊楓岳

清晨力疾寫新詩寄與春空錫杖飛一萬二千
峯北指東華五十九年非

奉次李判官重汝涵見贈韻

我本支離者君猶矍鑠我同庚見何晚反已愧
非才再佩金章地三飛玉管灰春城坐無語空
憶故山梅判官與余同年生未嘗一
面今始相遇故第二聯云

寄送趙承旨善述之任善山府君曾為榮
川郡守尚

州牧使

百年榮辱似風花嶺外三行不足嘆山以善名
人字善定知天意慶君家

新造明倫堂成聊題短作示諸儒生

郡邑明倫例有堂江都廟學獨荒涼捐貲敢愛
鳩材用闕制堪羞養士方禮樂詩書遵四術君
臣父子樹三綱白頭老守經營意說與青衿成
或忘

三月三日

東風吹柳未全顰獨坐南榮岸角巾地瘴汀雲

昏潑墨天晴麓雪冷鋪銀一春忽屆重三日九
歲曾加半百身老去感時心易折荒年無計答
佳辰

荒城不忍見民貧釀輟官厨瓮起塵水國本來
非樂土春風何事似蕭晨連天海霧晴仍噴背
日江花凍未顛坐度流觴舊佳節乾愁還作獨
醒人

義賢上人曾於去歲八月上旬自南漢山
城來見余今又以三月初六日來訪求詩
率題以贈

上巳三晨後中秋四夕前砌寒蛩泣露汀霽柳
縈烟石洞談青鶴雲庵記白蓮連年相訪遠滯

卧愧華顛

青鶴洞在智異山
白蓮庵在德裕山

贈燦浩沙彌

獨坐江城暮逢師輒解顏三年海印寺一月俗
離山乍聽蟬南往常隨鴈北還金章翻自哂不
及衲衣閑

示義賢上人

雨霽江城淑景佳詰朝扶病卧山齋南竚智異
穿雲壑東履金剛跨石崖谷鳥聽應心忽醒巖

花看却眼方措今春又負尋真約獨對禪公話
老懷

寄題慶萬戶水樓

斷崖高起水樓新白馬山蹲碧海濬賈舶風帆
天際曉田家烟樹雨中春一瓢自覺無塵事萬
戶誰言是武人鼻祖本居仁物縣直思投綬去

為隣德水廢縣乃高句麗德物縣一云仁物縣
新羅改號德水我先祖本是縣人也樓

在縣南白馬山下故未聯云

三月初見杜鵑花

三月二十日杜鵑花始開閏年春候晚窮島曉

寒催新萼故堪愛老顏方自哀民飢官廩罄况
乃對塵壘

三月二十二日李判官汝涵携酒見訪以

長律一首留贈求和輒次其韻而謝之

病思田里未能歸江海春生滿目悲誰怕是非
喧衆口只憂寒暑切民肌五更雨濕鵑啼近三
月風涼燕乳遲今日對花孤笑發細斟君酒詠

君詩

宦情如水但思歸病起春城益自悲溪柳隔烟
顰翠黛野桃經雨褪紅肌二毛偏恠形先老一

甲休言月較遲荒歲却蒙携酒到愧無佳政副

清詩尚與不判官同歲生少一月判官鬢

心同蜀魄不如歸熟食江鄉意轉悲遭亂幾曾

銷杜膽負病無復實陶肌揚村老僕徵得急沔

曲微兒報信遲曉夢忽驚先隴隔滿城風雨在

新詩右和寒食日見示之作本家先塋

尹直長 挽詞

五十年非耄膏肓病未嬰如何直丹禁奄忽閉

玄扃筮仕靈微祿明經屈大名翰林刀下血行

路涕俱零翰林直尚衣院暴疾昇出時子

耄庵宋子深 新自鎮安罷歸戲贈之

我友才名大誰言政術踈惟應百里宰不必五

車書在邑無新袴回鄉只弊廬湖南六十吏上

考果何如時以殿最

江都府中本無梅花有人來言沈秀才

家一株正開頗甚奇絕馳往見之花已盡

謝徘徊良久感歎成詩以貽主人無示同

來諸君時已巳三月之晦

老下都無興端居出郭稀如何訪梅處忽是送

春時石逕飄殘蘂苔庭逗暗翻小詩吟自苦留

作後年期

題沈秀才諷士安野居

覓路白蓮庵北岑青松道士卜居深誰言海鳥
魚蝦浦得見山園梧竹林新藕未生池影定晚
梅初落逕香侵坐憑苔磴不能去谷鳥相呼春
日沉

奉次李判官汝涵見貽二首韻

余嘗用俚語作憂民短歌李判官翻以
文字演成菩薩蠻一章遂用其韻而答
之

及口則粥吾口食田野何時似即墨莫云使君
飽其奈閭里飢寧出我身血願滴爾家匙老幼
各飲滿無飢亦無渴

李判官知余有區區愛君之心作憶秦
娥一章以示余余亦用其韻作為戀

主詞以自唁云

和氏血抱玉洒向空山月空山月白首新知青
春遠別 又過清明好時節刺桐花落歸心絕
歸心絕杜若汀洲蓬萊宮闕

奉次鷗洲李汝涵待家釀新熟期以四月

望日邀會積石寺詩韻

花事闌珊薄領中鷗洲西隔兔橋東每回病眼
看人白誰破愁顏借酒紅鵲噪忽蒙雙鯉至蟻
浮無許一鷗同詩筒促我尋山展月滿禪房不
負公

疊用前韻却寄李判官汝涵仍簡宋鎮安

子深

九十春光一夢中夕陽西下水流東連堤弱柳
傷心綠夾路天樨照眼紅戎服不知何日了醉
鄉誰與古人同李侯佳句煩邀迓題壁應須待

宋公

奉酬李判官汝涵復用前韻見寄之作

兩賢辛未一年中却作參商此海東博戲自嗤
呼五白詩名常羨號三紅方知月日張巡後最
喜襟期鄭老同兄事從今好相逐不須稱我使
君公判官生於陰慶辛未五月十七日余
生於是歲六月二十一日故篇內云

寄片雲上人

師時在秦安郡
北金掘山寺

手題新句寄雲公尊北何如住樵東

秦安古號
尊城沔

樹城號霜落岸楓丹照日雨晴汀柳綠搖風沁城
已過三春後沔路曾分六月中每憶關河唱歸

鴈夢魂無夜不相通余竄鏡城時曾以俚語作歸鴈歌二闕師常為余唱之以慰余故云

送義賢上人還南漢山天柱寺追寄七言近體一首

孤城吹角鎖重圍
邏卒傳呼警夜頻
獨對杜鵑花上月
却思天柱寺中人
離愁若絮清明日
宦味如紗老病身
回首轉慙留別語
未歸田去又經春

戲贈權全義夔汝吉宋鎮安子深

南里權全義西隣宋鎮安先朝丞相系晚歲廣

看真一義賢書每朝笑向闍人問余愛僧耶僧愛余

六月二十五日戊寅晨起口號余以去歲六月二十五日甲寅上任今乃三百七十有五日也

十年重按故城池坐度星霜屈一葺車駕曾臨兵亂日里間俱散旱荒時才微只合聲名損政拙元無惠愛遺心似履冰頭似雪俸錢空愧荷恩私

七月初三日丙戌大雨

火輪燒夏水如湯秋到清商破寒陽四野玄雲
連海嶠千峯白雨瀉天潢芸夫詐更憂時旱績
婦惟應喜夜涼老守坐看真宰意定將豐歲報
明王

自七月丙戌至戊子連雨三日戲留李判
官汝涵宋鎮安子深兩君要共賦詩

老懷無賴簿書叢此夕虛齋野望通七月炎蒸
三日雨百年踈懶兩詩翁豐苗頗慰憂民地惡
草翻慙愛士風留與納涼聯秀句歸鞍莫促各
西東

文官避世資三徑還家闕一簞踈頑忝地主愧
未罄交歡

書富平吳府使汝完令公詩帖用東臯

崔相公韻汝完少受業東臯嘗問詩法東
臯作序文以示重贈一絕句西垞柳相國
玄翁申相國俱步其韻汝完裛為一帖仍
索余追和甚懇敢蹈續貂之譏云

國朝山斗仰東西玄相青雲不可梯一卷指南
三老訣借聽何用岳聾題

荅金僉知律書

一別曾經二十春死生千里隔音塵寄書海舶
翻相問遺愛慙非漢吏循

念知東
萊人也

李持平源性挽詞

八十吹填六十篋彩衣身戴鐵冠危貂蟬正見
門闌慶辰已翻聞道路悲曾枉弊居纔隔歲旋
蒙榮問未移時兩家先系同鍾李却幸徐卿有
二兒

戲示妙正上人

野性從來時俗疎却教瓶錫集官居裕嚴德峻
供山果志敬玲瓏惠澗蔬纔聽法林天悟偈旋

早秋久雨奉簡鷗洲李判官汝涵仍送米
五斗

一雨成霖十日遲空齋忽念子桑飢曾經歲熟
家偏窘况遇年荒齒更衰晚稻未登無處貸新
麩方罄幾時炊龍鍾不是烏程令故送長腰且
莫辭

奉答李汝涵再用前韻謝惠米之作

對案公堂下筋遲秋霖不忍見民飢况君異日
身謀拙與我同年骨力衰五斗却慙分月俸一
家猶喜續晨炊古來失職憐貧士誰向天官誦

楚辭

辱贈盈箱報却遲囊空無計救調飢身同鶴瘦
才猶健節比松高志未衰見說五年三邁患憑
知十日一營炊何由薦士賔遺什擊柝宣尼尚
不辭

次韻奉酬李判官汝涵

司馬為文本類俳濟時誰許孔明才空瞻紫陌
朝天去每憶紅旗破賊來持竿叔近氣方銳上
樹少陵心尚孩毫矣一身江漢外百年人事日
悠哉

廊廟之姿老草萊天入家世鬼仙才筆精定使
鍾張服詩法真從鮑謝來一見豈惟如故舊相
知不必自童孩吹噓誰送青冥上合掌經綸贊
大哉

秋日述懷

臣罪如山 聖渥深起分銅虎此重臨纔驚夏
旱泉皆涸旋怕秋陰雨太靈熙代尚揮憂國淚
歎年徒抱愛民心莎鷄日暮還催織未效涓塵
愧寸忱

贈李子範時李子和特權伯高位三秀才

體素齋李實之初擢第直拜檢閱終于宗
簿寺僉正石洲權汝章曾爲童蒙教官今
贈司憲府持平兩君年皆止四十有四子
範昆季乃體素之子伯高乃石洲之子也
藝文檢閱李僉正司憲持平權教官天下奇才
止於此人間行路何其難陽春白雪爲誰唱流
水高山不復彈皓首今逢兩家子一樽江海秋
雲寒

八月初三日乙卯

世亂身衰歲又飢况逢秋日轉堪悲寒蛩咽似

貧眼語老柳顰如病吏姿黍穗未黃風振墉稻
名猶綠雨漫陂家僮不解憂民意却恠居官體
益羸

秋日雨中奉柬李汝涵仍送魚二尾

秋日題詩問野居閉門霖雨定何如本來潘岳
爲官拙更見嵇康與世疎昭代無因薦一鷄荒
村空復寄雙魚至今枚數安貧者彭澤歸田尚
有廬

具司議士慎挽詞

三月桃花錦浪生歸舟東上漢陽城膏肓當日

經冬病齟齬通家曩歲情司議忽加承旨命正
言元荷翰林榮彩衣祝壽新堂在秋到虛高鎖
雨聲公以子鳳瑞翰林時原從功

仲秋月夕真一希安二師來自南漢山

曾過水國返山城錫杖還從送日迎秋月憶同
今夜色道人者是去年情東西路共回仍往
下弦常缺又盈衰疾獨慙顏狀改未拋符竹謾

勞生

師於去歲七月晦來訪余八月十二日
去今則以八月十二日來到故首聯云

八月十五夜與真一希安兩上人翫月

碧空如洗玉河流力疾黃昏上古樓兩箇野僧

留外友十分江月出中秋詩成遞和驚烏鵲
到爭嘗轉斗牛忽記陰山舊題句此身逾覺

聖恩優

萬里陰山對華髮一年明月照中秋
乃余甲子秋窳鏡城時作故未聯云

中秋對月贈希安真一兩沙門用去年秋

謝師見訪詩韻

宿雲初散月增華小閣鉤簾夕望餘縱使枝筵
歌窈窕豈如賓榻會袈裟吟眉對蹙頻揮塵笑
口交開細啜茶此夜陰晴同萬里五更清景屬
誰家

秋夕月下聞道路歌呼之聲謾題遣懷

去年無麥又無禾坐憫流氓失撫摩秋熟始知
廬舍飽月明頻聽路衢歌曾傳馬島回蠻舶旋
說龍灣息虜戈從此黃堂且高枕白頭搜句頌
時和

奉簡素翁趙校理持世

故人天路極飛騰馳譽明時價倍增錦襖玉堂
新內相鐵冠烏府舊中丞早年序齒呼兄弟平
日忘形結友朋須念一州如斗大白頭官况冷
於冰

奉謝海嵩尉尹令公書問

玉樹郎君枉接裾得諧門館念離居江郊伏日
鵝黃醞海島秋風鵠白書高義薄雲公子重老
身漂梗故人踈負暄堪笑田夫意急把霜螯替
鯉魚公之子也時為翰林適奉使事而來得致公書

寄謝鄭奉教和書問

江國秋傳翰苑書少年才俊記踈迂一時父子
孫兄弟三代公卿士大夫豈有全家俱擢桂曾
無繼世各聯珠忘形自此成膠漆不復清朝泣
向隅

贈別蔡秀才後述之歸洪川山居

一為遷客侶猿猴蒿藿三年病未瘳蔡子當時
真漂母洪川却望是并州新詩忽見成珠玉古
獄誰知射斗牛此去後期君莫說鬢絲江海又
逢秋時君赴京城監試初舉
製詩見屈故第二聯云
李判官汝涵別試初舉擢一等第三戲書
以賀時京城分設二所
各取一百四十八
百四人居第三行年五十九奇男曲高寡和
昔猶歎材大晚成今誰慙對策丹墀終逐北登
名黃甲直圖南老當益壯誰能敵傳與儒林作
羨談

經歷金晦叔宅與宋鎮安子深賞菊

九月初一日菊花開滿枝閨年秋色早虛館雨
聲遲行挹鎮安袂坐傾經歷危洪川忽回首洗
盡楚臣悲

九月初一日菊花開滿堦幽香擁小徑寒艷映
高齋閨歲看偏早常年比倍佳峽中秋酷似忽
復豁吟懷

九月初一日菊花開滿庭丙寅秋尚憶洪峽句
誰賸忽似莊生夢曾同屈子醒香醪今共泛益
覺荷思榮天啓丙寅年閏六月故菊花曾亦
早發時余謫居峽中有閨年

秋候早八月菊花
開之句故篇內云

對菊詠懷

每年秋日菊開花底事江城發興加晚節本非
新露葉寒香都是舊霜葩只思北地池郎舍更
憶東川朴叟家再佩金章十載後玉樽相對稱
恩華

九月九日

去年歲惡蒼生飢九日誰舉黃花厄如今九日
禾稼熟士女扶醉喧莊遠霜濃草木秋偏麗兩
鬢山河夕轉奇老守亦知幽興發急沽隣酒坐

哦詩

重陽

平生五十九重陽誰遣今朝興最長桐葉只似
他日赤菊花渾作昔年黃屢經禍亂身猶健繞
遇饑荒歲且穰浮世坐看流景促一回高詠一
街飭

送希安師歸南漢山

白月中秋滿黃花九日鮮淹留兩佳節述作幾
新篇吏案愁奚破禪關夢自牽層巒隔孤嶼此
別又經年

與希安上人別後志敬禪師見訪

秋深江雨霽府舍淨無埃昨夕安纔去今晨敬
忽來老年資法侶休日費詩材更有盆中菊繁
葩次第開

南宮逸人搆子久草堂庭前菊花盛開置

酒邀賞醉書以贈

昔年但識南宮面今日始見南宮心清秋邀客
具鷄黍菊藥滿地茅堂深下有荷塘上梅塢手
栽松竹皆成林南宮逸人君莫問且聽東岳先
生吟

復用前韻示南宮子久

一園花木各成陰聞子十年勤用心洛陽救苜
掘來遠日本躑躅封植深竹菊松梅上下砌梨
槐柿杏東西林好是春風與秋月瓦盆留着使
君吟

題南宮子久草堂

騎馬緣溪上石崖愛君雲麓結茅齋芭蕉葉傍
梧桐塢躑躅根連芍藥堦採菊逕深人自靜種
荷池小境尤佳却看三角山相對一壑烟霞入

老懷

余家田庄在於三角山下牛耳河故云

竹籬高繞石蹊斜，庭後庭前皆菊花。誰道二千九百戶一州，秋色屬君家。本府境內合二千九百四十七戶
君家二十七花中，種菊偏多幾百叢。開盡寒葩九日過，一樽留醉此衰翁。
衰翁無興出官城，木葉經霜落滿庭。愛物古來成性癖，却尋叢菊到山亭。
山亭對酒野情新，共泛黃花不記巡。見說早梅開更好，小詩留約此尋春。

辛忠義奉繼送汁菹謝以凜扇

不見辛君久，秋深落木疎。去年三斗酒，今日一

缸。蘓白首，縻官務黃花。阻野居，湖南凜竹扇。愧欠右軍書。

李忠義說汝挽詞

系聯先妣祖宗別，大君孫喪亂頻遷。舍沉綿久閉門，晚生猶闕面。秋日忽招魂，七喪三佳婿。終堪慰九原。

次韻奉酬李判官汝涵

今夕清秋盡，空堂獨爾思。白頭攀桂日，丹悃獻芹時。水落魚龍冷，風生草樹悲。何當共戮力，斯世濟艱危。

已陵東指路悠悠日落秦城滿目愁江接海門
環古堞野分山市八危樓身同司馬方多病心
似靈均要遠遊錦樹盡凋秋又晚不堪霜髮坐
盈頭

宣務郎任君

翼挽詞任秀才景
嚴君也

接開曾先世分符又此州誰云三日別忽作九

原遊寓殯緣荒歲歸魂就故丘嬰病未哭送心

愧負明幽

故任承旨

諱夫人昌原黃氏遷葬挽詞

承旨門闌冠摺紉閨闈婉德淑夫人曾玄一百

綿中外七十春秋近八旬癸巳旅墳開已巳廣

萍歸舸過通津故阡經亂終同穴年少孤孫負

土親前曾孫景游年纔二十九歲新丁外艱獨
當大京兼奉夫入靈輓歸葬于廣州先塋

夫人享年七十有六內以
曾玄孫一百四十餘人

工曹李正郎

勸因事見罷書此以慰

春坊先輟職水部近收官自結姻婚後仍交父

子間別詞蒙繾綣家食想艱難斗米分新俸臨

題且厚顏公之弼孫景一甫曾先罷官
景三之子梓為我仲兄氏之壻

奉簡竹西沈

宗直僉知

敬問竹西老新詩今幾篇苦吟晚成癖佳句近

多傳亂日勞征旆炎天在別筵隔年言疏闕公
務坐縈纏丁卯春奴賊之亂余謫在洪川獲蒙
赦宥奉詣行殿來到府地公即日見

訪故篇
內及之
十月十六日丁卯大雷震

十月十六日午晴晡疾風雷霆動厚地兩電散
層穹天道不虛應 聖心能感通胡為出定異
危坐夜叅中

次韻奉酬判決事孤石睦禹卿同年

九人三十一年前同上龍門豈偶然白首只今
餘幾箇隔江相望暮雲邊萬曆己亥夏同榜
九人今只存三人

策名平日愧盧前最愛清詩似浩然生死從來
見交態去年相送石湖邊去歲君三昆季
送我去石江上

宣室何年席更前奇功猶未勒燕然白頭世事
全無意只是丹心捧日邊

江雪漫天古郭前忽吟佳句思飄然煩君莫說
琴堂事病卧文書擁枕邊

奉荅茶山睦湯卿承旨書問用禹卿見寄
韻

南冠催詣北扉前握手惟君意惘然高義至今
深鏤骨不堪回首夕陽邊

三株玉樹立風前銀杏亭中一粲然心愧別來
無所寄尺書空在海門邊在銀杏亭
當時戰藝氣無前身事如今最落然歲暮賴君
兄弟在兩封書札一江邊

得喪無端在眼前聞君生理尚蕭然一缸封寄
雙螯去風味猶堪着酒邊君時以事罷官

戲贈宋秀才子清無示子深

戊辰十月十一日是日生者宋子清癸酉九月初十日宋子深以是日生先而戊辰後癸酉九月其弟十月兄去月子深值生日勸我一呷聯

十觥子清今又挈二榼云是生日之所營子深
家酒味冷烈釀法真似出宜城子清家酒清且
醜色香不減斟烏程弟兄生日各見餉定知歲
熟無飢氓飢氓曾不見君比夏月充腸唯菜羹
君今無恙豈不樂我乃酌酒相對傾舉盃仍唱
祝壽詞小宋大宋樽常盈年年生日無醒日然
後可謂時太平曹子建七啓春清
縹酒康狄所營
奉簡吏曹李天章參議
侍郎三十賜緋魚再拜天官位望殊 聖渥即
今期報荅肯教滄海有遺珠

梁肉如山醉作鄉東銓豈復憶南陽只應海胃
名堪愛舊味登盤合一嘗

次韻寄酬李應教道章

憶昨東西郭看君伯仲情通家兩先祖佐幕一
諸生罷餞愁堪慰端居老可驚琅玕徒滿腹叫
闔幾時呈

翰札逾年廢初非損故情只緣逢赤地無計活
蒼生百蛤聊相謝三魚且莫驚臘前盈尺雪豐
歲瑞方呈

贈別 奉先殿叅奉李泐泗源歸艱志州

鄉墅叅奉大人前漢城庶尹公生於嘉靖
癸丑長我十八歲叅奉生於萬曆甲午少
我二十三歲庶尹公嘗為琿山郡守我時
為錦山郡守故篇內云

十八年先兆三後於君父子我當中二州琿錦
治初竝一島叅留宦却同交契只應無老少世
途誰復較窮通鯉庭歸報魚書日莫說霜毛已
作翁

冬日述懷

朔風吹雪撲層城蕭野寒雲接海平閭里稍豐

除冗務簿書尤簡稱閑情酒憑客貫瓶仍滿詩
對僧題字頗清回首鬼門關外路一身如夢萬
緣輕

法林長老與天悟禪師相繼而來喜書以
示

每聞雲衲入州城門吏偏驚倒屣迎只為老身
供劇務未能真界乍閑行懸燈話處心逾遠對
榻眠時夢亦清雪後况逢雙道友五臺山月眼
中明林公新自五臺山來悟師亦盛稱五臺山之勝
重贈法林天悟兩上人

歲晏身多暇公門晝不開誰知林老至更報
師來雪重雲沉郭天清月轉臺烟霞十日語一
榻隔塵埃

雪後月夜對志敬師口占

地迥千山雪天寒萬壑冰海雲都淨洗江月忽
高升好是三更夜添渠一箇僧真如玉京裡仙
鶴不須乘

寄賀李衛率尚子文擢庭試壯元拜禮曹
佐郎

禮部新負外六場羨壯元盛朝收國士華闕系

王孫賜蓋雲翻巷榮筵雪飈樽江湖身獨遠不
得賀高門

李秀才子和擢庭試丙科詩以賀之用前

贈韻

少年才譽動長安擢第爭推作好官賈氏文章
父子羨陳家功德弟兄難共知繻昔終軍棄誰
待冠今貢禹彈歸趨門間倚西日桂花枝映雪

峯寒

賈氏父子乃賈至陳
家弟兄乃元方季方

李判官汝涵見屈殿試赴庭科又不得志
而歸戲占長律一首以寄慰云

泥金方待報鄉隣誰料清時泣玉頻得失元從
一夫目文章虛負百年身早知梁顥成名晚終
見曹松賜第新君舌尚存牙未落會須雷雨起

沉鱗

見己巳十一月十九日邸報戲書以志之

藝苑爭衡集代英古來鴻匠主文盟王楊盧駱
雖前後洪鄭金張孰重輕委寄並應紆 聖眷
選掄元自協輿情只慙瓦礫叅珪璧第五還同
小杜名時大提學圈點共鶴谷居首鄭愚伏金
清陰張谿谷及余與李五峯并六人叅

云圈
故

追次五山車僉正見贈韻與車結城轉載
厚同賦時崇禎己巳冬十二月十七日

五山曾於萬曆乙未首夏差祀官抵松
岳取路是府余時避海賊之亂寄寓城
中五山用府舍壁上諸公舊韻留贈而
去奄忽俛仰之間死生榮辱人事百變
三十有五年于茲矣今者載厚來訪余
感念往事相對潸然因共步其韻以述
懷云

乙未詩新夏摩尼闍故岑存亾三紀過寵辱百

痾侵野雪連天凍江雲接地陰阿戎負文彩遺
韻又賡今

奉酬沈竹西令公用余韻却寄之作

使回蒙辱荅華札帶清篇五鳳翻相許雙魚未
早傳古都停駟騎初度厠賓筵盛集今如夢偏
添別恨纏公詩有五鳳今推碎之句余曾送洪
魚二尾故額聯云天啓癸亥季冬余

七十歲常誦周詩三百篇庶清為世服孝友自
家傳少日托仁里前年臨祖筵華章却見寄坐
失宿痾纏

贈別經歷金晦叔歸京城

京闕豈云遠歸朝亦有期
只緣二十月不作須
吏離荒歲憂民日清宵戀
主時忽然先我去
老淚滴新詞

次從姪汝固見寄韻

吾宗大司諫
中貴轉飢寒
故墅臨雲壑
輕舟下
雪湍才高公
議服道直宦
情闌三歲思
瓊樹無
因寄一歡

一室新川曲
臨江五月寒
深思理烟艇
直上泝
風湍許國身
何補縻官歲
又闌羨君歸
舊隱菽

水奉親歡

附原韻

故老相傳說今年最苦寒
雪深埋岳頂冰厚
合江湍消息中原斷
兵戈一紀闌
遙知梅閣興
非復竹林歡
白壁逢人眄
青松閱歲寒
一官淹莞鑰
兩地阻風湍
世故何時了
今春又向闌
長思南郭會
文字奉清歡
再從姪植

除夜

谷狼山狂朔吹
獐頭雲壓屋
雪闐城魚符又送

三冬盡鳳曆初頒一歲更老子襟懷如有失窮
年事業了無成只應舉稷都俞日除夕猶能意
自平

除夜贈村秀才汝潤

甲子除夜漁郎里君作鄉豪我逐臣已巳除夜
江都館我為府帥君旅人炎風朔雪各天壤臘
酒春燈相主賓是日尋思是身事不須歡笑不
須嗔

庚午元旦

元日人家笑語譁使君何事獨含嗟頭童不但

鬚成雪耳聵仍無眼着花徒佩虎符淹海甸才
提龍劍靖胡沙蹉跎六十年今滿九萬扶搖計

已差

共歎光陰過眼頻歲朝奚自賀孤身我生隆慶
五年夏今見崇禎二載春保障真如趙尹鐸離
騷曾作楚靈均大都人世無數六十齡人定
幾人

題慧瑜上人詩軸為志敬師自傳燈寺來
請而作

早住傳燈寺常依志敬師道心聞已慣神骨見

何遲到郭非他事留殘要我詩青山却歸去恐
失白雲期

寄片雲上人

金堀山頭寺聞師愛此居雪蹊行覓句雲榻坐
青書隔海逢人少經年寄信疎烟霞未赴約空
愧左銅魚

贈別族姪南聞慶鎮之歸揚州田居用

亾友任修撰茂叔韻

六十年於世胡為一見之通家俱地下失路自
天涯江海逢春日田園避俗時歸途語令第思

舊不勝悲

開慶之弟正言純時在京城萬曆庚子夏余以北評事辭病而歸曾見正言於淮陽官舍正言伯父時為府使陪飲至醉未幾府使公卒于官

鄭叅判 豈 汝秀挽詞

侍從先朝逮 聖明玉貂金虎稱聲名三年奉

使張槎遠萬里還家陸橐輕葦茲構讒如白日

膏肯嬰病奈蒼生廣陵東望空垂淚坐負揚州

吊北征

君生校我少三年一疾纒纏鬢尚玄遠謫每思
憐我獨新歸誰道哭君先夢中面目心馳地別
後精神手答牋浮世亦知淹幾日只應泉路了

前緣

李永興壽夫人楊川許氏挽詞

寒碧樓中掌舉秋曾陪志范丈人遊後生尚慕
卿才大當日仍聞婦德優二紀哀榮再歌哭九
原霜露一松楸克家賴有郎官在全義揚川信
匹休永興公自號志范其先乃全義人
也有一子曰碩其曾為戶曹佐郎

族姪韓秀才熙挽詞

一巷東西隣隔屋兩家中外派同源佩弦終是
謹教士披褐早為冥漢君楚澤吟時頻送酒莊
盆鼓處急臨門死生恩義親兄弟洒涕官城未

繞墳

許秀才格自楮島別廬乘小舟載酒而來

留數日及至告歸風雨暴作終日不止仍
不得行率題以示君曾問字於洪川謫居
故首句云時崇禎庚午寒食前三日也

湘潭負笈喜初迎背首湖鄉歲幾更江樹遙分
楮子島海雲低接沁州城百年肝肺一樽酒二
月浪波三日程真宰定知傷別意預教風雨作
清明

重贈許格秀才

巴陵才子氣凌雲，住在清潭島上村。
東峽謫時曾對榻，北原歸日旋敲門。
乘舟直擄揚花渡，挾筴無携竹葉樽。
生死賴君憐一老，少年高義動乾坤。
指島下有淵名清潭，北原乃海村先登也。

次片雲上人見寄韻

客愁如絮鬢如蓬，六十人間一病翁。
慙愧禪門報消息，春眠初熟日方中。

二月三十日

二月三十日杜鵑花滿園，纔經孟夏閏剝遣仲春。
暄淑景正堪賞，幽懷誰與論。兩年住孤嶼，空

復一傷魂

奉別李泗源參奉

海島花初發，山程客欲歸。
無端風雨惡，似識別離悲。
一晝仍停旆，三春獨掩扉。
所嗟官釀廢，踈羈作相思。

三月三日

河漢之西湖，海東小島一館高。
城中欲雨欲晴野，雲黑半開半落江。
花紅佳節再逢身，尚滯故人相憶信。
難通蘭亭曲水，更何日樵悴空成霜。
髮翁右有懷京中說故

屋角羨娥劇擲梭霜髭摘盡自成婆已知下邑
尋遊少况耐中年患難多眼暗不關花似錦耳
聾無賴鳥如歌一春令節重三日只把新聯三
獨哦

公舍無人到常如野老家誰知上巳日獨傍後
園花潦倒驚身事稽留怯物華似聞隣酒薄稚
子且休賒

丁巳迄己未曾過三月重戊辰及庚午三月又
重逢一紀四佳節六旬雙老翁江城今日恨獨
對故花叢右楮什
元氏

春日有感

共見韶光每歲同今春却似異東風柳條驛處
非深綠桃蕊敷時儘淺紅世亂惟應心悄悄年
衰不但眼夢夢觥船可掉猶無興况耐官樽酒
亦空

戲贈禮曹尹參議敬知幼一

我亦春官舊侍郎當年四十七星霜逢君今日
傷心事青眼全稀白髮長禮曹參議時年四十

有七君今亦四十七歲故云
八日全無一日醒梨花初發杏花零白頭江海

留君曲付與官僮子細聽兩真殿奉審到本

府留至八日而去

奉寄延安吳府使汝完

常憶廣州吳隱之貪泉自酌有遺詩承家節操
從君見奕世聲名舉國推卧治翻空海臯獄去
思爭立桂陽碑一官無效江都守却愧三年稟

尚縻延安別號海島富平別號桂陽

多謝益州伯殷勤露肺肝平生紫蝦盃不羨碧
霞丹病口須滋味餘波及老殘時時佐危酒非

獨勸加餐右謝惠以紫蝦盃

奉常寺僉正梁子漸慶遇以監刈到通津不
肯相訪但寄示長律一首輒用其韻而答
之

春晚孤城午夢遙隔江誰料有傍窺是非世事
終奚問翻覆人情早自知幾過門前休枉駕却
臨河畔只投詩青眸重對嗟無日獨望行塵白
髮垂

南宮子父草堂春日賞花重題壁上

崖闢園庭蹊鑿池草堂真與主人宜赤楓黃菊
九秋日紅杏碧桃三月時去歲曾蒙置清醪今

晨却要賦新詩風流丘壑有如此六十醉翁添
一奇

江府荒村少物華獨憐春滿卯君家自從二月
及三月初發一花仍百花素藥壓籬晴擁雪紅
葩紫塢晚蒸霞老夫乘興輒相訪索句不知山
日斜子文生於巳卯
歲故云卯君

三月晦日

六十歲翁鬢如雪後年那復見東風一盃今日
落花畔翁不別春春別翁

春盡書懷

揚花飄雪草鋪茵獨坐荒城度兩春海港橫分
沔陽浦江流直接廣陵津田園在眼青山晚簪
笏無心白髮新伯玉知非今六十會須歸作葛
天民

題姜博上君白茅堂壁上

小齋如斗膝堪容幽鳥聲中午睡濃野斷江光
明一曲山回樹影暗千重東堦露裊新栽竹北
塢風生舊植松官罷見君歸卧穩直勝袍笏趁
晨鐘

姜君白博上宅與邑中諸人燕集

宋鎮安子深申叅奉光汝清黃叅奉寔
君實全生負以韓座首崔沈生諫辛生
後黃生樂季生警黃生峻權生仇廡監
官應安主簿瓊山人志敬乃余丁卯春
奴獍之亂自洪川謫所蒙 恩赦奔行
在來依姜君時所嘗見德者也於是置
酒高會相與樂燕而罷以示物有不可
忘之意云時崇禎三年歲在庚午夏四
月二十日己巳也

南冠初脫峽東囚馳詣行宮此沁州桂玉幸蒙

諸子弟風塵能認舊君侯青山獨徃羈形老紫
綬重臨 聖渥優少長却邀為客處一盃春酒
散千憂

四月二十五日甲戌朝起口占

江河襟帶海咽喉控制三方置一州初佩魚符
卅月滿再紆龜鈕二年周曠官豈有絲毫補浮
食真同雀鼠偷忽憶幽荒禦魅日誤思難報面
驛羞

奉次都體察副使李叅判景尚古翰

十年心尚赤萬事髮全黃起廢金章重防虞石

壘長每思象可汗無路握干將逆氣吹遼海還
聞羽檄忙

題積石寺南樓贈妙正上人舊韻

逕又棠花發簷乃燕子飛眼青曾到處頭白始
歸時採藥揚南谷又魚沔北磯十年前後恨留
與一樓知

庚午五月十七日與宋鎮安洲子深暨鄭

叅奉捷李叅奉泗飲于鷗洲李判官汝涵

山園是日乃判官初度也用判官韻題贈

日過端陽月仄中謫仙今夜降天東一官曾恠

袍纔綠六袞偏驚頰尚紅才人不為衰世用道
高真與逸民同坐慙蒲柳叨庚契祝壽期君後
木公

留贈餞行諸君

一佩鱗符閱兩暮蟾輪二十五回虧心同社燕
辭巢日身似春蚕上簇時重地本無留羨化虛
名終未報殊私守官前後空縻廩深愧諸君捧
別卮

庚午五月十七日吏曹以余任滿將出交
代擬望入啓自上下教特仍今年翌日

夕邸報到府無任震惕惶問之至謹書以

志

歲饑無術活民流春夏連年日夜愁嚴譴幸稽
三考過謬恩翻許一冬留謾傳父老俱相賀獨
對山河益自羞世事轉艱身太老未酬隆委恐
招尤

奉謝延安吳府使汝完令公以紫蝦盃青

瓜瓞交沉一缸見惠

蝦紫瓜青共漬盃一缸盛出十分添冬春所寄
三為幸陸海之珍二者無忽喜新緘今又到却

慙饒口老無厭食明珠白璧終何報早識河南太
守廡

次宋子深見貽韻

平生補衡俊今日孟郊窮官罷湖州北身歸海
島東每慙公廩減未慰野廬空但見吟詩苦藜
床鬢似蓬

奉和宋子深立秋日用杜工部韻見貽之

作

歸心似江水日夜向東流紫馬俄三歲玄蠶又
一秋尚飛關外檄誰運幄中籌霸業宜修德兵

機貴伐謀蒼茫遼左路寂寞沮西樓漢使踰年
絕胡塵匝地浮孤懷徒自憤宿恙未全瘳直欲
投簪去松楸守故丘

寄謝興陽黃明宰 來惠扇

籍甚興陽宰清才衆所欽一封三伏扇兩地百
年心炎微乾坤闊荒江歲月深碧霄無到日空
寄白頭吟

奉簡李持平士以 行 李正郎士致 行 昆李

無示李參議天章 明 李應教道章 漢 昭兄弟

時聞讀書堂 命題之制 天章居首賜虎

皮一張道章居第三賜豹皮一張故第二
句云

國士無雙士文章有兩章少年三吏部明代一
臺郎白首通家分青雲照世光尺書今斷絕誰
復念江鄉

附次韻

養拙仍多病投閑欲上章平生遲見事前後
忝為郎綠蟻盈樽味明珠燭室光團圓詩酒
興回首水雲鄉 白洲李明漢

用鄭雪谷 誦 韻書洪崖先生遺稿卷末為

洪監司景望霧豐寧君洪汝時作洪崖

乃洪令公十代祖也高麗忠敬王朝以詩鳴於世官至都僉議舍人貶為東萊縣令而卒公之友雪谷後到東萊追思有詩汝時嘗為興海郡守景望曾為嶺南方伯俱用其韻以記先蹟于東萊碑上云

崖翁百世士文彩映朝端雪谷留高詠菜山屈

小官蟄龍霖雨隔鳴鳩歲時闌嶺表傳餘慶聯

芳有二難遺稿中有元日詩末聯云

鄭參奉高希挽詞順陵參奉丁內艱未及再

并致病

名家曾說白眉良誰料蒼天此莽茫周太學中

新選士漢諸陵下晚潛郎三年未輟高生泣一
疾俄傳舟子亾霜髮秋風老地主欲題哀挽不
成章

寄送黃司藝滿行源之任潭陽君曾為温
陽郡守而君之子佐郎來時宰興陽故首
聯云

温陽今剖潭陽竹曾見興陽屈大兒並世本稱
瑚璉器幾時俱到鳳凰池邑饒魚苟堪供養俗
尚絃歌要卧治二十年前却回首愧無遺化且
含悲

喜片雲上人自湖西至

儂身岳峙汝雲浮老幼平生風馬牛長白山逢
困敦夏洪川縣別攝提秋流單闕火依湖郡伏
執徐金隔沁州此日相看拍手笑七年榮落幾
息讐

片雲師遽欲歸以詩留之

憶曾遷謫與誰遊千里相尋一比丘雨雪蔽天
沙塞曉風颭號壑峽山秋身衰忽作三年別地
僻那辭十日留小吏不知高義在却嗤公館宿
聯裯

李判官汝涵作具體七言長律二首見寄乞米輒用其韻而答之

玉珂袞袞青雲端朱門酒肉高於山何意天公
徧覆燾獨令國士恒飢寒飛書昔聞子美杜乞
米今見真卿顏坐愧消中未曩飯龍鍾空戴貂
蟬冠

岐昌姜里象尼陳自古成雷歎聚蚊一歲幸生
幸未夏兩家俱系敬寧君江湖身遠逢知己蓬
華才高見出群病卧浹辰書疏闕隔窓梧葉落
續紛敬寧君之子曰梧城君曰牟陽君曰銀川

君曰豐城君曰清平都正乃君

王父也年陽生連豐守乃我先慈氏外王父也
銀川生彭山守乃我先君外曾王父也我與君
並為敬寧君內外
後孫故第四句云

次韻奉酬李判官汝涵秋日見寄

七步詩曹植三部賦左思平生經濟志虛老
聖明時海近秋城濕風涼曉角悲坐慙彭澤令
歸去有遺辭

雨中秋氣冷匡坐問誰思破屋青山路殘編白
髮時歲豐家轉窘身病語殊悲天意吾方認添
君幼婦辭

中秋月夜贈片雲上人

絕塞磨天嶺巖城鎮海樓當時共邊月此地又
中秋戀主孤臣淚思鄉老吏愁白頭唯爾在隨
處作青眸

江甸新留守關城老謫臣誰憐此秋月曾照昔
年身竢罪追前事知音托上人至今滌辱境逾
覺寸心親

九月九日

霜重江城木葉稀疾風吹鴈拂雲飛十年再到
官還滿九日三逢事轉非伏枕此時依藥鼎解
符無計阻荆扉白頭去歲黃花畔沽酒猶能醉

落暉

江島東瞻御陌南古園喬木曉霜酣十年前遇
月日九一室中迎兄弟三戲服綴萸聯異彩壽
觴浮菊進寒菴老身孤露今何忍鄉黨吾廬入
羨談

重陽

閉門僵卧起偏遲秋晚佳辰自有期霜岸赤知
楓樹葉露堦黃見菊花枝那堪司馬消中日又
是昌黎暴下時聞說郭南年少飲夕陽回首意
逾悲

時與諸君約會南宮子父
家忠病未得赴故未聯云

戒淨上人乃義賢師沙彌也自南漢山寺
袖五峯月沙諸相國詩遠涉風濤來示索
和余辭以才蹟思酒不敢贅一語師留三
日不去戲步其韻而贈之

遠衝風浪背雲山虛譽堪吟筆硯間乞取一聯
三日駐沙彌忙處使君閑

九日喜戒淨上人至

舊俗登高日孤城抱病時何言衲子到似趁菊
花期野冷蛩聲近川明鴈影遲百年吾已老為
爾一題詩

東陽尉樂全居士到金浦墳庵乃於重陽
日以短律一首附諸戒淨上人見問江都
輒次其韻作爲二篇書事述懷却寄以謝
攀栢三年後班荆一日間長河分燕尾遠岫擁
螺鬟恠我眸偏暗聞公鬢亦斑清秋知己淚洒
向岳僧還
詞翰江湖外交親季孟間夜濤喧石齒晴嶂聳
雲鬢去國頭渾白逢秋菊自斑誰能收老馬倦
鳥只思還

附原韻

申翊聖

象利臨無地星壇指點問江潮通一帶海嶠
露雙鬢秋霽乾坤闊霜酣楓桂斑筆展倍惆
悵消息待渠還

九月初吉乞恩省掃自廣陵舟下金浦
淨沙彌隨之到望海庵便告辭謁江都
使相遂以短律贈之實致意於使相云
爾

奉酬東陽尉申令公用師字舊韻垂示之
作

紫氣浮關詎得知隔江烟樹碧參差菊花特節

金陵浦空在瓊書寄機師
風疾乘衰不自知手題方見字參差欲施艾炷
求新效江島無因覓灸師
天意如今未可知古來人事喜參差十年江海
憂時淚胡騎長驅破六師

附

申翊聖

江漢帆程取次知祗緣風雨計參差暮投村
店懸燈坐辛勞隨行有淨師
岳老風流也自知歲寒交誼未參差他時
下客踈放樽馮論文是我師

自廣陵舟行到新川口遭風雨夜投江
店無聊發戒淨詩卷見東岳師字絕句
有懷謾步其韻

重贈戒淨上人兼寄義賢長老用軸中前

韻

白蓮庵在九峯山一逕青松杳靄間底事又歸
南漢寺北方人恠未曾閑師與賢公曾住靈光
郡白蓮庵今又來高

南漢
山寺

戲作俳諧體二絕句贈別戒淨沙彌兼寄
希安上人兩師時共住南漢山寺

曾愛希安非在貌何妨戒淨且無文海棠金橘
鱗魚恨却笑彭云我亦云
愛爾孤雲獨鳥身老懷堪笑此酸辛恰如年少
西行日浮碧樓前別美人

與京城流寓諸人會于南宮子久草堂

蔡君緝時立平康人生於嘉靖丙寅權

全義夔汝吉安東人生於隆慶丁卯李

判官重汝涵全州人與余生於辛未禹

君後善應丹陽人與宋鎮安淵子深瑞

山人生於萬曆癸酉黃參奉建君實昌

原人生於丁丑南宮生楸子久咸悅人
生於己卯李參奉迪仁老全州人生於
庚辰成生憲公則昌寧人生於壬午
金生重德厚慶州人生於丙申李生璽
彥潤全州人生於丁酉尹生殷而進坡
平人生於壬寅成生琢汝珍昌寧人
於甲辰金生仁元甫安東人生於戊申
共十五人皆自京城來者也

首丙寅身末戊申座中辛未第三賓歌傳綠酒
斟盈學舞折黃花插滿巾宋子偏逢禹子睨權

君却避蔡君嗔可憐十五人俱醉庚午重陽後
浹辰

十姓相逢十五名雙金四李與雙成蔡權禹宋
黃南尹捻是門闌佳漢城序齒菊花前席地拍
肩秋月下飛觥老翁短句留題壁一醉風流萬
古情

塞鴻驚叫曉飛霜力疾秋風訪野庄短髮了無
臨鏡白寒花空復夾籬黃人生到底俱如夢世
事從前祇自傷醉折茱萸催插帽諸君且莫笑
顛狂

奉簡李參判命昌期令公

早識真鋼百鍊精一身終見玉壺清
壬歲喜稱兄弟甲乙科慙號主生
沔北野廬初枉駕嶺東關路數傳聲
何時共酌桑郎酒更對黃花話別情

戲答竹陰趙參判怡叔書問

只見君書不見詩知君不許我相知
老來慣認人間態莫恠經秋報信遲

因御史褒聞有表裡之命

綉衣銜命密諮詢行遍窮閭奏北宸
怨讟正聞

騰畎畝褒恩誰識降絲綸性迂不得勤為政才
短何能惠及人跪奉紫泥封一襲素餐三歲愧
州民

劇寄因仍老疾嬰畧無才力稱經營虛名忽愧
推清儉異數偏驚出聖明雨露濕雲褒墨重
雪霜鋪日賜紬輕洪恩如海終何報稽首瞻天
淚欲傾

寄賀李洗馬子範登第

君以今年庚午春生負第一新擢別試
第二君弟子和去年己巳冬庭試登科

時為翰林

一百人中第一人莫嫌今作亞元身君家積德
爭相賀元弟連年擢桂新

奉簡善山趙善述使君

君雖少我只一齒我眼全昏君耳聾早識人生
信無幾晚看身事畧相同江間日月三年後嶺
表乾坤萬里中安得城西共歸去夏暮春酒作
隣翁

以銅鐵新造飲盞寄贈沈秀才士安

愛汝林園好銅盃寄我詞縱非華屋用真與野

入宜曉雨花開日秋風木落時客來如酒熟一酌一相思

善山趙使君善述書致海松子率題以謝君去年春曾惠青魚故篇內云

老境三年別涼秋一紙書顧余羈思切知爾宦情踈路遠今松子官清曩海魚論文果何日又恐歲催除

題辛忠義而善野居屋壁

愛君高卧水雲村養疾平生懶出門翰墨詩書佳子弟桑麻黍稷羨田園僮能漁獵供厨膳婢

解琴歌俯酒樽白日但消碁局上世間朱紫不須論

九月二十九日乙巳

海嶼之中古城上日暮獨立臨長河山川寂寥鳥獸絕草木搖落風霜多天時自昔有如此世道至今無奈何沔曲揚津隔一水三年未去空悲歌

贈元明沙彌

少年禪子號元明眼目如冰骨更清安得春風與爾去蓬萊頂上採芝英

我守江都三過秋四祗園裡閱緇流形神獨愛
沙彌秀一笑雲山萬念休府地諸刹時皆頽毀
有白蓮積石傳燈

淨水
四寺

府舍書懷

人說官榮我慮深夜無眠睡晝呻吟春天乍霽
偏憂旱夏日仍靈旋懼霽炎見野耘嫌廣厦凍
聞村織愧重衾老身却記林居味飯煮山蔬愜
素心

李判官汝涵鄭叅奉士閑各推乃酒饌而來
留話三日以詩謝之時崇禎庚午孟冬十

月之望也

歲暮羈愁自萬端誰言三日賴窮歡經書學業
貧叅奉賦頌才名病判官愧我曾無助稼穡憐
君却為費盃盤狂詞記取真顏色附與州人子
細者

十月二十八日李判官汝涵鄭叅奉士閑
復携酒見訪

倒屣相迎自剖符邇來懸榻幾招呼謫仙獻賦
傾多士通德傳經伏老儒一月却携家醞再三
年曾慰旅情孤臨筵預惜分裾意欲倩龍眠畫

作圖

以銅鐵新造飲盞留贈南宮子文

為愛山園贈酒盃四時無日不花開老夫去後

君如記盃一斟時首一回

發京城還江都道中寄謝谿谷張判書維

持國携酒出餞無示時庵鄭舍人弘子容

白洲李叅議明天章雙溪李承旨景尚輔

再從姪澤堂植汝固

白首青雲參隔辰濁泥誰料枉清塵雪中無挈

一壺酒海內共推千載人却怕醉言譏世偽須

憐豪氣出天真憑傳鄭李從家姪別後詩筒唯
待頻

附次韻

軒蓋逢迎託盛辰相看意氣出風塵黃沙莫

說當年事白首終期我輩人別後乍傳詩句

穩樽前長憶性情真待君官滿東歸日酒賦

交權不厭頻

谿谷

會心聊復值良辰詩酒場中躡後塵一代風

流還我輩百年榮辱竟何人物情到底多翻

覆世事從來混偽真把玩新篇增意氣暗投

明月莫嬾頻

畸庵

文章千古盛茲辰前輩風流仰後塵飲錢都
門留幾日題詩官閣寄何人團圓定有新知
樂懶漫須憐舊態真報政歸朝應不遠暮年
還往莫辭頻

白洲

相逢取醉即佳辰襟照冰壺絕點塵浮世百
年無此會騷壇千古有斯人且將樽酒追文
舉更愛風流似季真歲暮不堪添別恨朔雲
寒月首回頻

雙溪

浮世逢場是我辰相尋更濯渴心塵高談迭

發無前敵大白交酬孰主人潁水群星堪奏
瑞彭城一夢訝尋真今朝阮巷門還掩悵望
江關雨雪頻

澤堂

奉次畸庵鄭子容絕句韻

試問漢江水離愁誰淺深吟君五字句會我百
年心

丘山巨罪重雨露 聖恩深向日千行淚憂天
一寸心

世路太行險人情東海深歲暮一杯酒男兒千
古心

老慙詩筆秃狂愛酒杯深一笑風塵內江湖萬
里心
相國風流遠餘生老病深悠悠百年事一語見
君心

附原韻

得御李東岳聯袂宋子深兩公渡江去誰慰
索居心

用前韻奉謝谿谷張判書辱和見寄之作
無東疇庵鄭舍人雙溪李承旨白洲李參
議三學士

聚散悠悠祗決辰憶君何事肺生塵詞華後輩
唯三子儒雅當朝第一人寵餞暫蒙高駕枉辱
酬偏許夙心真老夫垂死逢知己從此休嫌怨
句頻

浮世團圓要及辰蓬萊水淺幾揚塵平生願識
張都憲末路驚逢鄭舍人吏部少年偏俊逸揚
州當代最清真別來江國愁誰語樽酒論文入

夢頻

時谿谷新拜大司憲
雙溪曾為揚州按使

萬死投荒再起辰 聖恩無路報消塵魯連誰
許為高士豫讓曾甘似衆人已辨齊竽吹是濫

須知楚璧盜非真從今螻蟻全微命意茲何憂
謗更頻

獨夜江樓望北辰四年西塞再兵塵時危每愧
身無事主辱誰言國有人下邑簿書徒自誤中
原消息尚難真郵支未斬頭全白手握青萍擊
柱頻

附 次韻

四首新詩寄到辰讀來曾次淨無塵休言我
馬殊君馬不恨今人後古人直取性情方是
妙若論聲色總非真斯文一脉關元氣俯仰

千秋咄咄頻

迂踈無計荅昌辰漫向東華踏軟塵栢府久
慙叨要路芳樽空憶對閑人眼看世態年年
別時吐曾襟句句真率率詎堪酬盛什苦吟
終夕撚髭頻

千載風雲際此辰十年京國染緇塵唯應寂
寞寬閑地置我嶽崎歷落人閱世早知名是
幻觀身轉覺懶為真君詩說盡心中事讀向
晴窓擊節頻

三唐詩什盛茲辰大手如君最絕塵得意遠

期千載上知音多作九原人客朝尚白何煩
解世有雌黃總失真懶拙無心爭鬪距章成
莫惜寄來頻

谿谷

疊用前韻奉柬畸庵舍人無示谿谷大學

士白洲雙溪兩令公澤堂從姪萬曆辛卯三月余曾

謁松江相國於龍山亭榭故首篇云

辛卯之年月建辰龍山高館隔囂塵憶題芳草
樽前句見許謫仙天上人物態如雲看幾變風
流當日盡難真傷心四十春來事莫厭逢君置
酒頻

禿翁何意際熙辰曾恐衰骸作塞塵鸞鷲可姿
四學士珊瑚異彩一宗人新交雪屋杯投分盛
會雲殘句寫真歸到江城却回首 聖恩難報
淚空頻

曾見長星守大辰幾遭妖鵬上承塵甘為韃鞨
新窮鬼愧殺滄浪舊散人大理本從三字強流
言誰信一生真諸君此日瓊琚什直勝曹松哭

李頻

海東蠻舶擾壬辰丁卯西關陷虜塵 太祖山
河收舊物中興日月屬吾人詩功遠邁唐風變

字法新傳晉帖真彩筆此時分氣象獨嗟斑駁
索居頻

附 復用前韻奉酬東岳詞丈無示畸庵

子辛未正月未追和也

閣門昕夕起居辰班罷駢闐滿路塵對面不成拚小語吟詩聊復屬同人漢庭乍幸容張摯谷口誰能重子真冷眼共君看薄俗覆翻雲雨一何頻

雪月風花各占辰紛紛世故似沙塵長為踰鼓趨朝客却羨求田問舍人陶衛定輸千首

富丹青難狀寸心真交情直付形骸外造請寧須命駕頻

百六驚心記曩辰夕將昭質泥塵風雲幸際休明代雨露偏霑潦倒人衰相漸看顏鬢改冲襟獨保性靈真霜臺忝竊誠非分愧殺飢烏見刺頻

日日趨衙趁卯辰無因數拂容床塵知音幸已逢鍾子斷鼻唯須待郢人枕上功名身是夢糊頭傀儡幻疑真看來世事渾如許莫惜樽前酌酌頻

谿谷

奉謝通津鄭明宰送酒

昨日迎參議今晨謝翰林羸駮經古縣暝雨負
初心忽見王公酒方思宓子琴兩家終始義東

北一江深鄭君大人時為刑曹參議鄭君之弟

庚午十一月十一日上京二十日請及到拜

辭還歸江都參議公曾訪余京城龔居及到拜

相見因日暮驟雨鞭馬從過不得投進故第一

李司評先君改葬挽詞

公諱應進字子循其先星州人也少遊
退溪先生門下篤志好學不求聞達終

不為祿仕一松沈相國每稱其恬靜自

守不出戶庭歎服不已生於嘉靖丙申

卒於萬曆壬辰享年五十有七歲子男

五人竑尊竣均增竣掌隸院司評

星山家世杜陵身處士為名是善人且退陶

夫子業晚依松沈相公隣崇禎葬地遷庚午嘉

靖生年屬丙申五十七齡孫六十司評純孝出

群倫

李康津先君司果挽詞

再守江城掩六年一州人士慣招延唯君齒德

為稱首自少鄉隣莫比肩膝下四男兒並秀眼
前三女壻尤賢連姻况與康津熟此日丘原滂
正漣

十二月初九日癸丑大雨

今年冬日乍交凌臘月江流未見冰徹夕高風
鳴戶牖連朝大雨漲溝塍路深泥濘行人斷市
少薪藁價米增田舍老翁饒驗歲預憂楚麥失
豐登

奉次李判官汝涵冬日感懷詩韻

八口呻吟一涕洟病骸無力空相支年豐城市

人皆醉歲暮簞瓢子尚飢厚祿如吾心可愧窮
愁到此語何悲促分升斗酬清什旬月猶堪哺
衆兒

一哦君句拭雙淚遠愧漁陽樂不支羸骨本非
司馬病苦心真為拾遺飢朱門年少應相哂白
首途窮只自悲無限同庚府主意四鷄孫又八
魚兒

歲暮述懷

平居稼穡念艱難况佩金章忝府官陰怕雨霖
晴怕旱飽憂人餓暖憂寒重臨忽復三年滿孤

抱曾無一日安點檢病身成底事只添衰鬢雪
盈冠

庚午十二月二十七日辛未發江都還京
城甲串津上書示送行諸君

一萬三千五百人三年九百十三晨荒鄉歲惡
飢肩感瘠戶冬寒凍口呻政拙了無民乍恍今
苟常使吏皆嗔北風今日東歸路回首翻添汗
浹身

甲串津舟中戲占長律一首

余於萬曆丁巳夏始為府使戊午秋陞

為府尹崇禎戊辰夏來為留守十歲之
間凡改官號者三前後受任皆滿三年
而適時市井商人等及諸寺刹僧徒相
與聚集追送津頭故篇內云

塹城臺下甲津邊臘月風烟暗海天一府重輕
三改命兩朝前後六逾年羊公峴首龜龍石劉
守山陰父老錢何似岳翁官滿日市商禪衲擁
歸船

辛未元日

曉鷄初叫斗回寅閭巷喧闐賀歲新東郭樹連

先隴路北宸鍾徹早朝人虎符松岳山前吏蝸
室楊花渡上賓獨卧擁衾驚起坐百年今已六
逢辛

我生今歲是周辛六十人間又一春白髮禿因
曾禦魅蒼顏皺爲每憂民百年縱滿元如夢萬
念俱虛只有身晨起旅窓心自祝故園歸結老
農隣

楊花渡旅次奉酬谿谷張都憲人日遇雪
用前韻見問

暮年行路怯逢辰江柳先春颺鞠塵地白忽驚

天落雪月正俱喜日臨人拾遺詩語吟何苦方
朔占書驗或真憂國不堪兼病肺却教村酒請
徒頻

夏正初七最靈辰滕六無端散玉塵敢道時如
天寶日定知心似杜陵人憂深故枉篇章重別
久方思面目直莫問江湖春興在陰晴亦自檢
書頻

宿留荒江過令辰禁城軒冕闕音塵叩門忽枉
烏臺使傾蓋曾憐鶴髮人况復三章詩揔妙唯
應一笑意逾真看君對雪還憂世勦力行舒國

步頻

附 人日遇雪用前韻奉呈

新元七日號佳辰忽有飛雲壓路塵頗訝陰
晴渾失度更傳占候不冝人寒侵梅柳爭春
晚客在江湖引興真斟酌旅窓愁絕處漁村
酒熟問應頻

春來多病負良辰千騎歸時未望塵杯酒更
逢頽勝日草堂誰問斷腸人詩傳老筆才逾
健醉對新交語益真惆悵舊歡空入夢角巾
何地往還頻

城西長憶把盃辰別後詩篇託後塵官罷正
堪無事飲春回猶作未歸人文章要妙那輕
說名字紛紜定孰真最是君家阿咸在社中
酬唱不嫌頻

谿谷

附 昨來西湖陪集亦離索中罕遇事謹
用叔父與張尚書唱酬辰字韻以足八首
之數中多自叙之辭非以趁韻實因前日
燕叙規戒之語粗自效耳並丐斤教

于將乍斲氣衝辰騷曩曾知步絕塵韓杜高
詞傾館閣龔黃遺愛在民人凡間未辨神仙

表身後誰爲富貴真大理本非三后匹江湖
應復夢歸頻

湘浦天開雨露辰班公又踏入京塵八年放
跡還初地一代文盟不數人老態相驚班鬢
兀高懷早識徹皮真新春造請渾成懶此日
追歡未覺頻

生朝不恨值三辰箕斗虛名併一塵素祿微
班將老母青雲新進笑陳人光陰轉眼看遷
序憂患經心易喪真昨夜江湖春水動數行
歸鴈叫群頻

坎止流行自有辰此心終坐碍根塵墻東幸
借拙身地門外無無問字人舉世盡知貧是
病幾時方悟道爲真北窓高卧聞衙鼓堪愧
閑官引疾頻

餘生翹首太平辰飽受東華五斗塵但覺今
年非舊日不應吾道負前人田園暫往逢灾
魁關塞多虞逼女真賴有吾宗文酒社巷南
從此杖鞋頻

荆花交映賀生辰令宰華筵不雜塵吏部並
鑣皆國士納言聯席是宗人樽前綵勝催春

早雪後青山獻狀真契闊幾年今會合未嫌
深爵勸頻頻

奎躔重耀聖明辰荆璧隋珠競出塵牛耳盟
壇欣有主鳳毛家世豈無人提衡肯遣錙銖
誤啖蔗須知臭味真倘許金鑰開兩膜祖師
言下點頭頻

從姪植

附 奉次東岳谿谷兩詞伯酬唱見示諸
韻却呈求教

憶曾西郭盍簪辰木榻猶留坐席塵袖裡各
收接贈句樽前多是賞音人趨營每愧浮名

累氣既深知此老真但使暮年遺俗物好乘
清暇叩門頻

岳公文彩燦星辰珪軒絃無一點塵絕調爭
看盛唐氣才豪長笑小詩入音殊清濁誰能
了色辨黃驪本不真休說世間知己少和章
惟待唱來頻

三星初直我生辰翫驪寧容受俗塵已判頭
顛終薄相絕憐蹤跡是畸人老來頓覺機心
少靜裡唯耽道味真千里故園湖外路不堪
回首夢歸頻

天地初回梅柳辰雪殘街陌絕纖塵簪纓朝
請愁多事詩酒逢迎問幾人高適才名空到
老孔融情境始知真時清各喜身俱健乘興
何煩折簡頻不候今年五
十故五六云
客心寥落值茲辰墻底殘樽暗素塵詩記舊
遊分物色酒徵前令會詞人稱公知己同韓
子呼我為仙愧季真報答自無青玉案白頭
其奈苦吟頻右和人
之作
禁掖周旋記往辰玉墀飛步惹香塵官曹似
馬還今日門館登龍付別人處世久知身是

幻歲名方喜醉為真吾衰子貴俱安命歲晚
惟應會合頻

千古文明屬盛辰藝林爭欲襲芳塵能追絕
響誠難事狎主齊盟有數人模母效他西子
搽楚優那是叔教真誇多鬪麗吾何敢一唱
新篇吐款頻

畸庵

再用前韻奉東谿谷大學士仍示畸庵白
洲雙溪諸君澤堂從姪

尚書劍履上星辰鵬鷲秋天本離塵社稷早扶
多難日謳謠重見太平人三朝宦似安仁拙七

郡清非景倩真暮齒忘年新托契不愁昭代去
官頻

獨依漁舍坐窮辰鼠跡空床畫印塵去國三年
太歲日歸途十里異鄉人是非慣認名爲累榮
辱翻疑夢不真憲府此時都御史遠勞家隸寄
詩頻

憶上鄒書繫獄辰劉冠誰料拂埃塵洪川縣裡
三年客長白山前萬里人八座崇銜重歷假六
卿叅秩五叨真宦情已倦身嬰疾莫恠明時請
告頻

附 復疊前韻奉酬東岳詞丈

合璧聯珠此一辰清文高義絕纖塵聲華或
後功名會箋註何妨磊落人萬古江河終不
廢百年榮辱竟誰真公車簿責渾閑事大度
寧嫌百適頻

病怯春寒閉戶辰經旬客榻日凝塵名場乾
沒崇無策詩壘高堅鄭有人身計捲輸閑處
好世情那似醉時真端居細筭平生事掩却
床書感慨頻

氣弄新陽雪霽辰融泥全沒九衢塵春來物

色還 態病裡詩篇亦惱人長史早蒙劉尹
許步兵仍有仲容真清時懶漫容吾輩酒社
詞場發興頻

谿谷

附 謹次東岳老先生日雪中見寄韻
一自傾心得御辰相逢輒喜洗曾塵高才直
覺超前輩今世誰知有古人暫別忽驚年已
換舊歡還訝夢非真青春正值風光好劇飲
應須秉燭頻

長憶城西會合辰那堪咫尺阻清塵江干駐
旆春催柳雪後題詩日屬人佳句早知成性

僻深盃曾許道吾真他時浴下過從地莫恠
門前載酒頻

千載身逢際會辰肯愁書劍老風塵誰知旌
旆歸京日猶作江湖戀闕人詩寄草堂腸欲
斷才高柳絮語逾真明時好縱青真靴勳業
無勞照鏡頻

三迳蕭條伏枕辰蒲團終日任疑塵才慙白
雪高吟客書斷青雲厚祿人敢把梅花比何
遜思將箭笠學玄真踈狂最荷明公眷江國
春回寄句頻

雙溪

正月初八日壬午除授刑曹叅判

清晨郎吏到江干手捧除書墨未乾草木東風

上春日衣冠北闕少秋官九年重拜身雖倦萬

死孤生分所安却望興仁門外路郭西堪恠此

歸鞍余於天啓癸亥夏曾拜是職與仁門乃東

大路也了子春北窠時曾出此門今則從

正月十三日丁亥謝恩肅拜後口號是日

吉尹輝啓曰江都重地不可一日曠關

新留守令備局催促下送之意該曹入

啓已有日矣而備局趨不催送新留守尚

且下直事甚未安請備邊司常該郎廳察

守徑先上亦為不當前留守李其並察

之新留守李時白今明日內使之急速赴任何如答曰依啓新留守今日內使之

世情翻覆變寒炎塞北關東老病添刑部再臨

新獄訟海城重管舊漁鹽一身去國思猶鉅八

載歸朝責且嚴野性本無干祿意直思抽笏返

山潛

東岳先生集卷之十八 江都後錄終

